

Vijesti Fondacije CURE
„Sama nije tražila!“



Prvo izdanje

Želimo dobrodošlicu povodom prvih Vijesti Fondacije CURE koje obuhvataju događaje i novosti iz naše zajednice tokom perioda januar - mart 2021.

Uživajte u čitanju i ostanimo u kontaktu!

1. CURE - PROJEKTI

Global Fund for Women - Integrisane sigurnosti za žene

Cilj projekta je da se predstavi novi model kreiranja sigurnosti, identifikuju prijetnje s kojima se marginalizovane grupe žena (mlade aktivistkinje, aktivistkinje koje se bave ženskim pravima, žene iz Mreže policajki) svakodnevno suočavaju, te mapiraju strategije za održivost i opstanak. Sigurnosni rizici za aktivistkinje i marginalizovane grupe žena mogu biti fizički, emotivno i duhovno štetni, te prožimaju svaki aspekt života (tijelo, um, duh, porodicu, zajednicu, organizaciju itd.).

Organizovale smo radionicu „Integrisane sigurnosti za žene“ na kojoj su prisustvovala članice Mreže policijskih službenica. Jako smo sretne što smo uspjele stvoriti prostor za determiniranje organizacijskih i ličnih snaga neophodnih u razvijanju koncepta integrisane sigurnosti.



Učesnice radionice „Integrisane sigurnosti za žene“

Zagovaranje za ženska prava

Tokom projekta „Zagovaranje za ženska prava“, kojeg finansira Evropska unija, a realizuje Fondacija CURE (CURE) i Fondacija za osnaživanje žena (FWE), namjeravamo doprinijeti promociji i poštivanju ženskih prava putem programa koji ohrabruju žene i

mlade žene da poduzmu afirmativne akcije kako bi se iskorijenili svi oblici diskriminacije u BiH s posebnim fokusom na manjinske i marginalizovane grupe žena u deset (10) opština.

Projekat traje dvije (2) godine i u sklopu njega radićemo na jačanju kapaciteta deset (10) organizacija: Udruženje građana psihološki centar Sense iz Banja Luke, Udruženje žena Maja Kravica iz Bratunca, Udruženje građana „Probudi se“ Istočno Sarajevo, Udruženje žena „Romkinje“ Bijeljina, Udruženje žena „Pašinke“ zajedno sa Udruženjem „Sigurno mjesto“ iz Zavidovića, Udruženje žena „Nera“ Konjic, Udruženje „Ženska vizija“ iz Tuzle, „Aktiv žena Donje Moštre“ iz Visokog, Udruženje žena „Vrba“ Mostar i Udruženje žena „Srce i duša“ Prokosovići, Lukavac. Izradićemo i preporuke za bolji položaj žena koje će se promovisati u institucijama na lokalnom nivou.

U prvoj godini (2021.) provedbe projekta, radićemo sa pet (5) nevladinih organizacija u njihovim lokalnim zajednicama, a u drugoj godini (2022.) sa drugih pet (5), takođe u njihovim lokalnim zajednicama.

Zagovaranje za ženska prava
Women Human Rights Advocates



Finansira Evropska unija



Fondacija za Žensko Empoverment
Women and Her Rights
Fondacija za osnaživanje žena
Žene i Her Prava
Implementiraju:

Sveukupni cilj je promocija i zaštita ženskih prava kroz akcije s ciljem da se ohrabri učešće žena u suzbijanju svih oblika diskriminacije u BiH.

Specifični cilj je jačanje kapaciteta ženskih organizacija civilnog društva (WCSO), aktivistkinja i braniteljica s fokusom na manjinske i marginalizovane grupe žena u BiH.

Aktivističko nasljeđe - priče žena iz konflikta i krize na zapadnom Balkanu

Podkastovi posvećeni pričama i promociji žena aktivistkinja, te njihovim zajedničkim postignućima i uspjesima izrađivaće se u Beogradu i Sarajevu. Ovo će biti posebna prilika da se čuju glasovi i iskustava žena o njihovoj borbi, kako u privatnom i javnom životu, tako i tokom razdoblja pandemije COVID-a 19.

Aktivističko informatičko osnaživanje ženskih udruženja

Kroz saradnju sa Fondacijom za osnaživanje žena, Fondacija CURE upozнала je ženske organizacije s načinom izgradnje kapaciteta u online sferi djelovanja, načinom predstavljanja putem društvenih mreža, kao i s alatima koji mogu biti od koristi ženskim udruženjima. U okviru inicijative planira se podići svijest o važnosti korištenja online alata i platformi, te prezentiranju osnovnih informacija o udruženju i njegovom radu.

U sklopu ove inicijative do kraja marta organizovane su i jednodnevne radionice za ženske organizacije koje Fondacija za osnaživanje žena podržava kroz agendu „Život da stane ne smije“ i to u Konjicu, Mostaru, Zavidovićima, Lukavcu (Prokosovići) i Visokom.



23.02.2021. godine - članice Udruženje žena NERA, Konjic



25.02.2021. godine - članice „Aktiva žena Donje Moštre“, Visoko



19 i 20. 03.2021. godine - članice Dnevnog centra za socijalnu skrb „Kuća otvorenog srca“ i Udruženja žena „VRBA“, Mostar



24.03.2021. godine - članice Udruženja žena „Srce i duša“ Prokosovići/Lukavac

Zalaganje za ženska prava u Bosni i Hercegovini

Uz podršku švedske feminističke Fondacije Kvinna till Kvinna, Fondacija CURE nastavlja sa zagovaračkim aktivnostima za unaprjeđenje položaja žena i djevojčica u Bosni i Hercegovini.

U naredna #24 mjeseca, naš primarni fokus će biti na digitalnom zagovaranju kroz obradu #20 tema koje se direktno odnose na pitanja koji utiču na položaj žena u BiH. Razgovaraćemo o obrazovanju, zapošljavanju, eko feminizmu, brizi o sebi, nasilju nad ženama, ženskim pravima i drugim gorućim pitanjima. Imaćemo priliku raditi u #4 lokalne zajednice gdje ćemo zaštitnice ženskih prava podržati u definisanju lokalnih zalagačkih planova. U okviru zalaganja za

ekonomsko osnaživanje žena koje su preživjele nasilje, nastavice s našim zalagačkim aktivnostima usmjerenim ka kreiranju inkluzivnih politika zapošljavanja, te ćemo izraditi praktični priručnik o inkluzivnim politikama zapošljavanja.

Izgradnja kapaciteta Ženske mreže BiH

Uz podršku Fondacije TRAG i OAK, Fondacija CURE, kao koordinirajuća organizacija, nastavlja s izgradnjom kapaciteta organizacija članica Ženske mreže BiH. Kroz dodjelu grantova za tehničku podršku organizacijama, članice će imati priliku da ojačaju svoje interne kapacitete, te će im biti omogućeno učešće na radionici o izgradnji kapaciteta. Organizovaćemo svoju godišnju zalagačku konferenciju na kojoj će akcenat biti na pitanjima nasilja nad ženama i kako članice ŽMBIH u svojoj lokalnoj zajednici mogu direktno podržati žene koje su preživjele bilo kakav oblik nasilja i diskriminacije. Naša stranica www.zenskamreza.ba će i dalje pružati priliku i informacije svima onima koje rade na podizanju svijesti o ženskim pravima, te ćemo promovirati naše odgovore na najvažnija pitanja koja neposredno utiču na prava žena i djevojčica u BiH.

2.CURE - INICIJATIVA Covid 19 solidarnost



**„ZAUSTAVIMO RODNO
ZASNOVANO NASILJE”**

„Kad dom ne znači sigurnost!”

U vremenu globalne pandemije izazvane COVID-om 19, vanrednim okolnostima, pojačanim stresom i strahom za budućnost, Fondacija CURE je kroz svoju COVID19 akciju solidarnosti podržala nevidljive i ranjive žene i njihove porodice u našem društvu. Kroz našu

COVID 19 solidarnu akciju #TiNisiSama, članice tima Fondacije CURE su posjetile naše korisnice u njihovim domovima te im tom prilikom uručile određenu vrstu materijalne podrške i higijenskih sredstava. Podršku smo dale i ženama treće dobi, samostalnim roditeljicama/teljima, Romkinjama, roditeljicama djece sa invaliditetom i onkološkim pacijenticama, u potpunosti svjesne da su institucije sistema propustile da u mjere zaštite i podrške uključe one koje su i u uobičajenim životnim okolnostima gurnute na samu društvenu marginu. Ovo su neki od komentara žena koje su dobile podršku:

„Bio je Ramazan i najljepši mjesec u godini, bila sam sama, tužna, „zakovana“ u kuću. Osjećala sam se teško, zaista teško. Slabo sam mogla i jesti, postila sam, klanjala, uglavnom sam gledala TV.

Niko mi nije dolazio i nigdje nisam išla. Najviše sam sjedila na terasi, kada je bilo lijepo vrijeme. Volonteri/ke Centra za zdravo starenje koje sam prethodno pozvala telefonom, donosili su mi na vrata prehrambene proizvode. Sa prijateljicama sam komunicirala telefonom i to me radovalo. Najbitnije je da sam bila dobrog zdravlja, bez psiholoških problema.

Dobila sam jedan paket od općine koji se sastojao od tri kilograma deterdženta, jednog litra ulja, maske i rukavica. Dobila sam i donaciju od Fondacije CURE, vaučer u vrijednosti od 50,00 KM, telefonsku karticu u vrijednosti od 20,00 KM, maske, rukavice i higijenske maramice. Veoma sam zahvalna i općini i Fondaciji CURE.“

„Prvih dana izolacije u kući bila sam očajna. Vremenom sam se prilagođavala, nalazila više vremena za pisanje poezije i priča. Napisala sam tri pjesme i priču iz vremena kada sam bila tinejdžerka, kako bih se isključila iz ove nevolje. Priču sam nazvala „Platonska ljubav“. Pored pisanja, spremala sam kuću. Imam i vrt pa sam uređivala baštu i negovala cvijeće, a ruže su procvjetale i uživala sam gledajući ih. Zahvaljujući pametnom telefonu dosta vremena provodila sam na FB, Viberu i Messenger-u i bila u kontaktu sa svojim prijateljima i unukom kojeg obožavam.“

„Za vrijeme izolacije u kući dobro sam se osjećala. Radila sam svaki dan vježbe, slikala, igrala „stolni“ tenis na način da sam lopticom udarala u ormar. Pravila maske, oblačila se komično i pravila svoje razne

Šaljive fotografije, koje sam slala prijateljicama da im podignem moral.“

3. CURE AKCIJE

Osmomartovsko stajanje - Fondacija CURE organizovala je dnevno i večernje aktivističko stajanje povodom 8. marta - Međunarodnog dana žena u cilju da skrene pažnju da ni u vrijeme „mira“, u vrijeme bez prirodnih katastrofa i pandemija, životi žena nisu sigurni, a sa svakom društvenom ili prirodnom katastrofom, prava i sigurnost žena, djevojaka i djevojčica su dodatno ugroženi.



Online kampanja

Fondacija CURE je organizovala online kampanju kojom smo željele da skrenemo pažnju na nasilje i probleme s kojima se suočavaju žene u Bosni i Hercegovini, te koliko su stereotipi, predrasude i patrijarhalno nasljeđe uticali na kreiranje društva koje je tolerantno na nasilje i diskriminaciju.

Važno je da shvatimo da:

- #NasiljeSeDešavaSvimŽenama!
- #NePostojiOpravdanjeZaNasilje!
- #NasiljeSeTičeSvih!
- #ŽenskoTijeloNePripadaMuškarcima!
- #ŽeneNisuTražile! #NijeOdgovornostNaŽeni!
- #ŽenaNijeKrivaZaNasilje! i #NisiSama jer uvijek tamo gdje je opresija, tu je i otpor.



Nikad nećemo prihvatiti da smo #SameTražile da o našim životima i tijelima odlučuje bilo ko osim nas samih. I #NismoSame, naša pokretačka energija je u revoluciji, nastala zbog opresivnih tradicionalnih politika, fašizma, klerofašizma, nacionalizma i patrijarhata.

Izložba

Izložba povodom obilježavanja 8. marta sadržavala je sedam plakata, postavljenih duž Obale Kulina bana.

Tema postavljenih plakata odnosila se na centralnu poruku, a to je:

„Sama nije tražila!” Isticanjem različitih poruka na svakom plakatu zasebno, ukazalo se na važnost nulte tolerancije prema nasilju nad ženama i djevojčicama.



Video je dostupan na:

<https://youtu.be/6dyntJT7rGc>

Proglas Fondacije CURE o nultoj toleranciji na nasilje

Fondacija CURE je osnovana s ciljem stvaranja društva u kojem se ne toleriše nasilje, diskriminacija i mržnja. Kroz svoj petnaestogodišnji rad Fondacija CURE promovise kulturu nenasilja kako bi doprinijela boljem kvalitetu svakodnevnog života žena i drugih manjinskih i marginalizovanih grupa. Članice Fondacije CURE, u svojoj raznolikosti, okupljene su oko jedinstvenog stava, a to je da nema kompromisa sa nasiljem. Iskreno smo potresene nedavnom izjavom glumice Milene Radulović, ali isto tako smo ponosne na Milenu i sve druge žene i djevojke koje su javno istupile i pronašle hrabrost da pričaju o nasilju, seksualnom uznemiravanju i silovanju. Zato i zbog podrške #NisamTražila i cjelokupnom pokretu žena, djevojaka i djevojčica koje su digle svoj glas, odlučile smo da javno istupimo sa proglasom o NULTOJ toleranciji prema nasilju.



RAZLOG ZA NASILJE - Uzroci nasilja nisu alkohol, droge, izbor partnera/ke, mjesto i vrijeme gdje se nasilje desilo ili se događa. Razlog nasilja se može naći otkrivanjem njegovog uzroka. Uzroci nasilja leže u patrijarhalnom sistemu koji je često refleksija i dominacija muške moći. Suština svih oblika nasilja je zloupotreba moći i potreba za kontrolom žena i ženskih tijela. Patrijarhat, seksizam i nasilje opstaju zbog mreže osoba koje omogućavaju da se to desi tako što ignorišu, ne reaguju i traže opravdanje za nasilnike.

DEŠAVA SE SVIM ŽENAMA - Nasilje nad ženama je direktan produkt patrijarhalnog društva i zato se može dogoditi bilo kojoj ženi bez obzira na godine, socio-ekonomski status, nivo obrazovanja, mjesta boravka, lični izgled, način oblačenja, te se dešava u javnom, privatnom i virtuelnom prostoru. Nasilje vrše poznate, nepoznate osoba, partneri kao i članovi porodice.



#FondacijaCURE #8mart #zenskaprava
#TAMO GDJE JE OPRESIJA, TU JE I OTPOR

Koliko god nas ugnjetavali, prigušili, potisnuli, ignorisali, mučili ili/i prozivali ponižavajućim imenima opresivni sistem iznjedrila snažne i hrabre žene, djevojke i djevojčice koje bez obzira na eru, kulturu, politiku pokazuju otpor. Žene koje će javno reći istinu o svom iskustvu nasilja, žene koje će zahtijevati slobodu za sebe i za sve žene. Žene koje kreiraju pokrete solidarnosti i podrške za sve žene. Pokrete koji nastaju iz potrebe da se konačno progovori o seksualnom uznemiravanju i seksualnom zlostavljanju kojeg žene trpe u javnom prostoru.

 [fondacijacure/curefoundation](https://www.facebook.com/fondacijacure/curefoundation) 

Poster sa ulične izložbe #SamaNijeTražila povodom osmomartovskih aktivnosti koji je izradila Tanja Ćurić za Fondaciju CURE

NE POSTOJI OPRAVDANJE ZA NASILJE - Sve dok se propituju žene koje proživljavaju nasilje (zašto nije uradila nešto, zašto je bila tamo, što je obukla mini suknju, zašto nije vikala i sl.), opravdava se seksizam i nasilje, i nema društvene (a često ni pravne) osude. Onog trenutka kada rečenica: „Počinilac, seksista, nasilnik je kriv i ne postoji opravdanje za takvo ponašanje!“ postane norma, mi ćemo biti spremni/e da krenemo u novi dio historije u kojem će žene prvenstveno biti ohrabrene da javno reaguju, ali i da ne budu osuđene za to.

TIČE SE SVIH - Patrijarhalni stavovi pokušavaju sve oblike nasilja nad ženom smjestiti u privatnu sferu. Time što o nasilju ne govorimo, mi nasilje dopuštamo i opraštamo. Minimaliziramo posljedice nasilja nad ženama. Nasilnicima i silovateljima dajemo društvenu dozvolu da nastave sa nasiljem. „Lično je političko“ i zato borba protiv nasilja treba biti dio javne sfere. Idemo ohrabriti jedna drugu da o njemu govorimo, jer se tako zajedno suprotstavljamo nasilju.

NASILJE I SEKSIZAM NISU ŠALA - Seksisti, nasilnici i oni koji ih podržavaju često koriste „šale“ da provuku svoj seksizam, te da se na

taj način seksualno uznemiravanje i nasilje ne shvati ozbiljno. Sa „seksističkim šalama“ normalizuje se seksizam, nasilje, diskriminacija, te nasilje postaje norma u društvu koja motivise nasilnika da nastavi s nasilnim aktima.

ŽENSKO TIJELO NE PRIPADA MUŠKARCIMA - Tretiranje ženskog tijela kao seksualnog objekta se stopilo sa kulturom i tradicijom. Žensko tijelo je najpolitiziranije pitanje društvenog uređenja (po čemu se razlikuje ljevičarska i desničarska politika) jer se politička koplja lome preko žena i njihovih tijela. Muškarci odlučuju u ime žena o njihovim slobodama, životima, tjelesnoj autonomiji, kretanju, načinu oblačenja, obrazovanju i pravima na posjedovanje sebe! Odluka koja bi trebala biti individualna odluka, bez miješanja države ili vjerskih lidera, dovela je do toga da se žene moraju pravdati za sve što odluče raditi sa svojim životima ili tijelima, a kad se nad njima izvrši nasilje moraju se pravdati društvu. Ženska tijela su svakodnevno bojno polje. Razorena tijela koja vrište pod raznim oblicima nasilnih činova.

Cure - ToR-ovi (opisi poslova)

ToR za istraživača/icu(e/ice) za provođenje procjene potreba prava žena za podršku zagovaračkim akcijama vezanim za osnaživanje marginalizovanih grupa žena i rodnu ravnopravnost u Bosni i Hercegovini - <https://fondacijacure.org/2021/02/6691/>

RESEARCHER FOR CONDUCTING RESEARCH AND DRAFTING BASELINE STUDY ON WOMEN'S ROLE IN PEACEBUILDING - <https://fondacijacure.org/2021/03/6755/>

ToR for Conducting needs assessment for Social research in support of advocacy campaigns related to empowerment of women and gender equality in Bosnia and Herzegovina - <https://fondacijacure.org/2021/02/6707/>

4.CURE - DODATNE AKTIVNOSTI

Online predstavljanje filma „Suočavanje s nemirom i izgradnja mira iz perspektive postdejtonske žene“ - <https://fondacijacure.org/2021/03/6738/>

NAJAVLJUJEMO!

PITCHWISE FESTIVAL

Ovom prilikom najavljujemo PitchWise festival ženske umjetnosti i aktivizma koji će se održati od 09. do 12. septembra 2021.

**Do tada, priključite nam se!
Pratite nas!**

Web: www.fondacijacure.org

Instagram: @fondacijacure

Twitter: @Fondacija_CURE

Facebook:

<https://www.facebook.com/fondacijacure/>

YouTube: Fondacija CURE



HVALA DONATARKAMA I DONATORIMA u 2021.!

Evropska unija; Kvinna till Kvinna; Global Fund for Women; Fondacija TRAG/Fondacija OAK; Die Feministische Friedensorganisation CFD; Mediterranean Women's Fund; Heart and Hand Fund; Sigrid Rausing Trust; CARE International; Balkan Trust for Democracy (BTD); Američka agencija za međunarodni razvoj (USAID); Zavod za zapošljavanje KS; Fondacija za osnaživanje žena

Hvala curama iz Konjica, članicama UŽ „Nera“ što su isplele #pussyhat (kape) za članice CURE tima! Sjajne ste! Mi smo spremne za nove ulične akcije!
[#pussyhat](#) [#solidarno](#) [#nijenamhladno](#) [#feminizam](#) [#aktivizam](#)



Molimo pišite nam na info@fondacijacure.org ako želite da vas dodamo na CURE listu ili ako želite više informacija o našim akcijama i inicijativama.

Tel/Fax: +387 33 207 561, Adresa: Fondacija CURE (Kuća Ljudskih prava), Dolina 1, 71000 Sarajevo, BiH
Web: www.fondacijacure.org